

Ponuda softverskog rješenja za autobusku stanicu

SpeedCode

Zmaja od Bosne bb

Sarajevo, 71000

Kanton Sarajevo, Federacija BiH

www.speedcode.ba

Poštovani,

Ovim putem Vam želimo čestitati, jer ste napravili **korak naprijed** i želite ići u korak s vremenom. Vrijeme u kojem živimo zahtijeva stalne izmjene i agilnost u poslovanju. Odluka koju ste donijeli, zasigurno pokazuje Vašu želju za usavršavanjem i napredovanjem u poslovnom svijetu, a mi ćemo se potruditi da Vam tu želju i ostvarimo.

Da li Vam se ikada desila greška prilikom naplate i izdavanja karti zbog ručnog pregledanja redova vožnje? Desilo Vam se da Vaši klijenti gube strpljenje zbog čekanja u redu koje je uzrokovano nedostatkom efikasnosti prilikom prodaje karti?

Većina Vaših problema uzrokovani su nedostatkom odgovarajućeg informacionog sistema. Kako bi Vaši klijenti bili zadovoljni, a Vašim uposlenicima bio olakšan svakodnevni posao, mi u SpeedCode-u Vam nudimo izvrsno **rješenje**.

Naš softverski paket bi omogućio efikasniji proces izdavanja, rezervacije i naplate karti, čime bi se smanjili **redovi čekanja**, a višestruko povećalo **zadovoljstvo klijenata**. Osim zadovoljstva klijenata, korisnicima našeg sistema će biti omogućen efikasniji i jednostavniji proces izrade novih, evidencije i upravljanja postojećim autobuskim linijama.

Rješenje koje Vam nudimo regulisat će prava pristupa pojedinim dijelovima softvera. Na taj način će se održati **integritet i sigurnost** povjerljivih podataka. U skladu sa pravima pristupa pojedinim dijelovima sistema, zaposlenim će biti omogućeno jednostavno generisanje izvještaja.

Pored gore navedenog, neke od karakteristika, koje će naš paket posjedovati su:

- **jednostavnost** upotrebe,
- **minimiziran** postotak pojave grešaka,
- mogućnost **proširenja**, u cilju dodavanja novih funkcionalnosti,
- **predvidljivost**, koja omogućava da se sistem ponaša u skladu sa novonastalim okolnostima.

Softverski paket

Softverski paket koji Vam nudimo podržava sljedeće segmente:

PRODAJA KARTI

- odabir autobuske linije, ovisno o odredištu i polazištu, te danu putovanja klijenta,
- ispis tablica autobusa, koji vozi na toj autobuskoj ruti,
- mogućnost odabira jednosmjerne ili povratne karte,
- ispis cijene vožnje tom autobuskom linijom u zavisnosti od vrste karte,
- evidencija datuma i vremena izdavanja karte,
- evidencija datuma i vremena polaska autobusa, te perona s kojeg polazi autobus,
- unos imena i prezimena klijenta, ukoliko se radi o međunarodnim linijama,
- pretraga autobusa po tablicama, te ispis kapaciteta i broja preostalih mjesta i zauzimanje jednog od raspoloživih mjesta u autobusu,
- evidencija datuma do kada važi karta, ako se radi o dvosmjernoj karti.

REZERVACIJA KARTI

- odabir autobuske linije, ovisno o odredištu i polazištu, te danu putovanja klijenta,
- ispis tablica autobusa, koji vozi na toj autobuskoj ruti,
- mogućnost odabira jednosmjerne ili povratne karte,
- evidencija datuma i vremena polaska autobusa, te perona s kojeg polazi autobus,
- unos imena i prezimena klijenta za međunarodne linije,
- pretraga autobusa po tablicama, te ispis kapaciteta i broja preostalih mjesta, zauzimanje jednog od raspoloživih mjesta u autobusu,
- evidencija datuma do kada važi karta, ako se radi o dvosmjernoj karti.

EVIDENCIJA AUTOBUSA

- unos modela, kapaciteta i tablica autobusa,
- ispis svih raspoloživih autobusa.

EVIDENCIJA RADNIKA

- unos ličnih podataka,
- radno mjesto,
- ispis svih radnika.

PRAVLJENJE IZVJEŠTAJA

- odabir tipa izvještaja (tipovi izvještaja su: izvještaj o prodanim kartama za određeni period, izvještaj o određenim autobuskim linijama za određeni period, izvještaj po vozačima gdje se može odrediti, kojim linijama je vozio),
- generisanje i ispis izvještaja.

EVIDENCIJA AUTOBUSKIH LINIJA

- unos odredišta i polazišta autobusa,
- ispis svih raspoloživih autobusa i dodjela jednog od raspoloživih autobusa autobuskoj liniji,
- ispis svih raspoloživih vozača i dodjela jednog od raspoloživih vozača autobuskoj liniji,
- datum i vrijeme polaska autobusa sa odredišta i polazišta.

Zašto SpeedCode?

SpeedCode je kompanija koja je prisutna na području Bosne i Hercegovine od 2005. godine, te je u toku svog desetogodišnjeg djelovanja postigla **zavidne** rezultate.

SpeedCode nudi softverska rješenja za klijente iz raznih oblasti poslovanja, međutim oblast u kojoj je usavršila svoje poslovanje jeste razvoj softvera za razne prevozne kompanije, autobuske i željezničke terminale, aerodrome islično.

SpeedCode je kompanija koja ima **10 sjedišta** diljem Evrope te zapošljava oko 1000 softver inženjera. Sjedište u BiH je veoma bitno za širenje kompanije ka istoku te za njeno dalje usavršavanje. Tim softver stručnjaka u BiH je uspješno završio nekoliko projekata na Balkanu, od kojih s ponosom izdvajamo razvoj softverskog rješenja za Autobusku stanicu Beograd i Autobusku stanicu Zagreb.

Kako ne postoje identični poslovni sistemi, ne postoje ni identična softverska rješenja.

Softverska rješenja i IT usluge koje SpeedCode pruža su **jedinstvena i prilagođena** potrebama organizacije, koja će ih koristiti u praksi.

SpeedCode ima poslovnu politiku koja podrazumijeva njegovanje odnosa sa klijentima, koja se postiže kroz otvorenu komunikaciju i radu na ostvarenju zajednički postavljenih ciljeva. Ono što ih čini posebnima u oblasti njihovog poslovanje jeste **visok kvalitet** isporučenih rješenja i uspješno **održavanje** sistema kroz duži vremenski period.

Šta nudimo?

U sklopu našeg softverskog paketa još Vam nudimo:

- **pomoć** prilikom odabira računarske opreme
- jednosedmičnu **obuku** rada na računaru za sve uposlene kojima je potrebna
- **telefonsku i online podršku** u toku trajanja garancije, kao i **brz odziv** na rješavanje eventualnih problema

Konkretno na izgradnji Vašeg sistema, radio bi tim, koji uključuje **7 osoba**. Na održavanju sistema bi radile 3 osobe iz tima. U periodu dok vrijedi garancija biste imali **punu podršku** tima za održavanje. Za nastavak saradnje bismo potpisali dodatni ugovor.

Cijena softvera: 8000 KM

Garancija: 5 godina

Vrijeme realizacije projekta: 3 mjeseca od datuma potpisivanja ugovora

Nadamo se da ćete razmotriti našu ponudu, te koristeći naše usluge podići svoje poslovanje na zavidan nivo. I zapamtite mi smo **Vaši igrači**, naš cilj jeste **Vaše zadovoljstvo**.

Svako dobro želi vam kompanija SpeedCode!